



Evalua bo politico: Sr. Mike Eman

PA haya un miho bista di e candidatonan prominente como politico, nos a evalua algun candidato prominente riba lista di AVP a base di un sistema cu 10 pregunta, manera publica den Guia Electoral di dialuna 18 november. E sistema aki ta evalua e prestacion y caracteristicanan cu un score di maximo 5 strea.

1. Integridad: Nan ta muestra honestidad y ta mantene nan mes na normanan etico den tanto nan bida personal como publico?

3 strea – Cu e escandalo y criticanan rond di su gobierno anterior, ta dificil pa dun'e beneficio di duda.

2. Responsabilidad: Nan ta tuma responsabilidad pa nan accion y decisionnan, tanto pa exitos como pa erornan?

3 strea – Aunke el a tuma responsabilidad, esaki a sosode tin biaha demasiado laat of demasiado limita pa tin suficiente impacto.

3. Habilidad di Liderazgo: Nan por inspira y guia otronan pa logra metanan comun?

2 strea – Su liderazgo a wordo critica durante añanan, recientemente por ehempel ora di compila e lista di candidato di su partido.

4. Habilidad di Papia: Nan ta comunica nan vision, maneho y balornan na un manera cla y convincente?

4 strea – Semper e ta elocuente, ta scoge e palabranan corecto y ta papia for di curason.

5. Conocemento di Asuntonan: Nan ta bon informa tocante asuntonan local, nacional y mundial?

4 strea – Ta raro pa topa cu ne sin un conocimiento profundo di e topico.

6. Curashi: Nan ta para pa nan conviccion y e interesnan di nan votadonan, hasta ora esey ta impopular?

3 strea – Hopi biaha el a para pa su conviccionnan, pero mas laat den su carera el a cuminsa scoge cada bes mas pa opcionnan populista.

7. Compas Moral: Nan ta pone loke ta corecto riba loke ta politicamente beneficioso?

3 strea – Aunke mayoria di biaha el a actua segun un compas moral fuerte, tabata tin momentonan cu su lealtad a lanta duda.

8. Vision pa Futuro: Nan tin un vision cla y inspirador pa progreso a largo plaso?

3 strea – E tabata tin un vision cla, pero e forsa inspirador cu e tabata tin un tempo, ta parece di a disminui.

9. Etica di Trabou: Nan ta muestra dedicacion y perseverancia den ehecuta nan tarea y responsabilidadnan?

4 strea – E ta excepcionalmente motiva, cu un perseverancia cu hopi biaha ta surpasa otronan.

10. Respet pa Institucionnan: Nan ta mantene e principionan di democracia y ta respeta e estado di derecho?

3 strea – Su respet pa institucionnan tabata fuerte, pero a bira menos visibel den algun caso controversial den su gobierno.

Mike Eman ta sin duda un di e lidernan mas grandi di Aruba. Cu mas di 8.000 voto riba su nomber, el a trece su partido dos biaha na poder su so y a realisa hopi pa Aruba. Na mesun tempo, su carera politico tambe tin momentonan menos positivo, cu preguntanan tocante integridad y liderazgo den e ultimo añanan. Sinembargo, su elocuencia y dedicacion ta keda caracteristicanan importante di su liderazgo.

MENSAHE DI DIA

20 NOVEMBER 2024

E rednan social ta haci
cu hopi hende ta core pa yega nan meta.
Corda, comparacion ta e ladron di alegria.
Pone atencion na bo propio caminda,
bo propio paso, bo propio competencia.

e Poder den Mi

Den colaboracion cu  Aruba Incense


 e Poder den Mi